



Namminersorlutik Oqartussat, Kommunillu sanaartugassanut aningaasartuutissaannginngaaniit ukiumut 1 %-imik, pisortat sanaartugassaataannut immikkut toqqakkanut kusassaanermut aningaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu Naalakkersuisut inatsimmik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Sanaartugassani kusassaanermi sanaartukkap silataata, iluatungaatalu kusassarneqartarnissaat matumani pineqarpoq.

(Inatsisartunut ilaasortaq Peter Olsen, Inuit Ataqtigiit)

(Siullermeerneqarnera)

Inissiani pisortaqarfiusuni Namminersorlutik Oqartussat Kommuunillu sumiiffimmi kalaallit eqqumiitsuliaannik kusassarneqartartussaatilelulugit pisussaaffeqalernissaat pillugu Naalakkersuisut eqqumiitsuliornermik ingerlatsineq pillugu Inatsisartut inatsisaata allanngorteqqullugu peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortanut Peter Olsen aamma Aqqalu C. Jerimiassen siunnersuutitut taakkununga, marluullutik pisortaqarfiusuni kalaallit eqqumiitsuliaannut tunngasunut.

Demokraatinut pingaartuuvoq, sutigut tamatigut eqqumiitsuliortortagut pikkorissut akuersaarlugillu ataqqissagigut. Aammattaaq, soorlu uani eqqartorutsigu pisortat illuutaasa iluisa silataasalu pinnersartarnissaat.

Siullermik pingaarnertullu oqarusuppunga, periarfissaqassasoq isumaqatigiissutiginnissaa, Namminersorlutik Oqartussat kommunillu missigersuutitik atorlugit piffinni eqqumiitsuliortut taakkualu eqqumiitsuliaat atortassagaat. Pikkorissorpassuarnik pinngorartitserusuttunillu eqqumiitsuliortoqarpugut, taamaattumik periarfissaqassaaq pisortat illuutaasa pinbnersarnissaat eqqumiitsuliortut nunaqavissut atorlugit.

Tulliatut oqarusuppunga, isumaqatigisorujussuugakku Inatsisartunut ilaasortaq Aqqalu C. Jerimiassen siunnersuuterqarmat Namminersorlutik Oqartussat kommunillu pisussaaffilerneqassasut pisortat illuutaasa silataasa pinnersarneqarnissaannik kalaallinik eqqumiitsuliortunik atuinikkut. Amerlavallaqaat illut isigiuminaatsut kusanaatsullu sumi tamaani, taakkua pinnersarneqaralarunik isumaqartorujussuussagalarpoq. Suliniut taamaattoq pilersarusiorluaraannik illunik kusanarnerusunik iluini silataanilu pilersitsissaaq taamaaliornikkullu aamma maani nunatsinni nuannaarnerulernermik pilersitsilluni. Isumaqarluinnarpunga, nuannaarnerulernartartoq eqqumiitsulianik kusanartunik takulluni. Akerlianilli iikkat isigiuminaatsut imaqaanngitsut nuannaarunnaartitsisarlutik.

Kommunit Namminersorlutillu Oqartussat pisussaaffilerneqarnissaannik siunnersuummut tunngatillugu



sanaartornermut aninaasartuutit 1 procentia immikkoortinneqartassasoq pisortat illuutaasa toqqakkat pinnersarnissaannut, qularnerulaarpunga ilumut taamaaliornissaq eqqortuussanersoq. Eqartutut isigaara taamatut procentilersuineq. Kissaatiginerugaluarpara, arlaatigut nutaanik sanaartornerni illunillu aserfallatsaaliuinerni eqqumiitsuliortut pinnersaasarnissaat suliamut ilanngunneqartassasoq. Isumaqarpunga, pingaartuusoq, suliniarnissatsinni inerniliussassat assigiinngitsut ammaffigigutsigit, isumaqarama, tamatta paasinnittugut, eqqumiitsuliortutta pisortat illuutaannik kusanarnik nutaalianillu takusaqarnerulernissarput isumagigipput.

Taamatut paasinnilluta siunnersuutit taakku marluk tamarmik Kultureqarnermut, Ilinniartitaanermut Ilisimatusarnermut Ilageeqarnermullu ataatsimiititaliami suliareqqinneqarnissaat innersuussutigaarput.